

Inatsisissatut siunnersuummut nassuiaatit

Nassuiaatit nalinginnaasut**1. Aallaqqaasiut***Siunnersuummut tunngaviusut*

Europami COVID-19-imik tuniluuttoqarnera aammalu Kalaallit Nunaanni pissutsit immikkut ittut pissutigalugit Nappaatit tunillaassortut akiorniarlugit iliuutsit pillugit Inatsisartut peqqussutaata allangortinneqarnera pillugu Inatsisartut inatsisissaat upernaakkut, apriilip aallaqqaataani 2020-mi allangortinneqarpoq. Naalakkersuisut, Tunillaassortunik nappaalanersuaqarneranut ataatsimiititaliarsuaq, Nunatsinni Nakorsaaneqarfik pisortanilu oqartussat allat, COVID-19-ip tunillaassorneranik akiuiniarnissamut pisariaqartinneqartunik pisinnaatitaaffinnik peqarnissaat qulakkeerniarlugu inatsisip allannguutissaanik Inatsisartunut pilertortumik saqqummiussisoqarpoq.

Inatsimmut allannguummi annertuumik pisussaaffiliisoqarnera pissutigalugu atorunnaarsitsinissamut aalajangersagaq ilanngunneqarpoq, tassa imaappoq Nappaatit tunillaassortut akiorniarlugit iliuutsit pillugit Inatsisartut inatsisaat 31. decembari 2021-mi atorunnaarsinneqassaaq. Taamaammat Nappaatit tunillaassortut akiorniarlugit iliuutsit pillugit Inatsisartut inatsisaat nutaaq januaarip aallaqqaataa 2022-mit atuutsinneqalertussat siunnersuutigineqarpoq.

2021-mi upernaakkut Inatsisartunut qinersisoqarnissaanut suaarutiginninneq peqqutaalluni, Nappaatit tunillaassortut akiorniarlugit iliuutsit pillugit Inatsisartut peqqussutaata allangortinneqarnera pillugu Inatsisartut inatsisissaat pillugu sulineq kinguartinneqarpoq, taamaalilluni nappaatit tunillaassortut akiorniarlugit Inatsisartut peqqussutissaat nutaaq 2021-mi ukiakkut saqqummiunneqarsinnaajunnaarluni.

Taamaammat siunnersuummi saqqummiunneqartumi atorunnaarsitsinissamut piumasaqaammi allannguisoqarpoq, maanna Inatsisartut inatsisaannik atuuttumik sivitsuisoqarluni, tassa Nappaatit tunillaassortut akiorniarlugit iliuutsit pillugit Inatsisartut peqqussutaat 1. juuli 2022-mi atorunnaarsinneqartussanngorluni.

2. Siunnersuummi immikkoortut pingaarnerit

Inatsisartut inatsisaannik allannguinnissamut siunnersuut una nappaatit tunillaassortut akiorniarlugit Inatsisartut peqqussutaannik kingusinnerusukkat allannguutitalimmik peqqussutaannit atuuttumit aalajangersakkanik ingerlatitseqqiinnertaqarpoq, taamaalilluni nappaatit tunillaassortut akiorniarlugit iliuutsit pillugit Inatsisartut peqqussutaat tamarmi 31. decembari 2021-mi atorunnaarsinneqarnissaagalua pinnani 1. juuli 2022-mi atorunnaarsinneqassaaq.

3. Pisortanut aningaasaqarnikkut allaffissornikkullu kingunissai

Siunnersuut pisortanut aningaasaqarnikkut allaffissornikkulluunniit maannamut naleqqiullugu nutaamik annerusumik kinguneqarnaviangilaq.

4. Inuussutissarsiortunut aningaasarsiornikkut allaffissornikkullu kingunissai

Siunnersuut inuussutissarsiortunut aningaasaqarnikkut allaffissornikkulluunniit maannamut naleqqiullugu nutaamik annerusumik kinguneqarnaviangilaq.

5. Avatangiisinut, pinngortitamut inuillu peqqissusaannut kingunissai

Siunnersuut avatangiisinut, pinngortitamut imaluunniit inuit peqqissusaannut sunniuteqarnaviangilaq.

6. Innuttaasunut kingunerisassat

Siunnersuut maannamut naleqqiullugu innuttaasunut nutaamik annerusumik kinguneqarnaviangilaq.

7. Siunnersuutip kingunerisinnaasai pingaarnerit allat

Siunnersuut annertunerusunik kinguneqassasoq naatsorsuutigineqangilaq.

8. Pisortanik aamma kattuffinnik il.il. tusarniaaneq

Siunnersuut ullormi 1. juuni 2021-mi tusarniaanermut nittartakkami www.naalakkersuisut.gl-mi tamanut saqqummiunneqarpoq tusarniaanermullu akissuteqarnissaq ullormut 29. juuni 2021-mut killilerneqarpoq. Tusarniaanermut akissutigineqartut oqaaseqaatinik ilaqartut oqaatsit atorineqartut allangortinnagit oqaatigeqqinneqarput, inatsisissallu nassuiaataani ilanngussami 2-mi pisariaqartitsineq naapertorlugu oqaaseqarfigineqarlutik. Tusarniaanermut akissutigineqartunut oqaaseqaatit naqinnernik orlingasunik allanneqarput.

Siunnersuummi aalajangersakkanut ataasiakkaanut nassuiaatit*§ 1-imut*

Nappaatit tunillaassortut akiorniarlugit iliuutsit pillugit Inatsisartut peqqussutaa allanngortinneqarnera pillugu Inatsisartut inatsisaanni nr. 1, 1. april 2020-imi § 2, imm. 3, Nappaatit tunillaassortut akiorniarlugit iliuutsit pillugit Inatsisartut peqqussutaat 31. decemberi 2021 atuukkunnaassaaq.

§ 2-mut

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, kingusinnerusukku allanngortinneqarnikumi § 32 ikkunneqarpoq. Nappaatit tunillaassortut akiorniarlugit iliuutsit pillugit Inatsisartut peqqussutaat nr. 20, 12. november 2001-imeersoq 1. juuli 2022-mi atorunnaartussanngorlugu

§ 3-mut

Aalajangersagaq Inatsisartut inatsisaata atuutilersinneqarnissaa nalunaarutigineqarpoq.

Ilanngussaq 1

Inatsisissatut siunnersuut inatsimmut atuuttumut sanilliullugu	
<i>Oqaasertaliussat atuuttut</i>	<i>Inatsisissatut siunnersuut</i>
<p>§ 2, imm. 3 <i>Imm. 3.</i> Nappaatit tunillaassortut akiorniarlugit iliuutsit pillugit Inatsisartut peqqussutaat kingusinnerpaamik 31. decembari 2021-mi atorunnaassaaq.</p>	<p>§ 1 Nappaatit tunillaassortut akiorniarlugit iliuutsit pillugit Inatsisartut peqqussutaa allanngortinneqarnera pillugu Inatsisartut inatsisaanni nr. 1, 1. april 2020-imeersutigut, (Tunillaassuinerup pinaveersaartinniarnani siaruarnaveersaartinniarnanilu aamma sullissiniarnermi pisariaqartitat il.il. qulakkeerniarneranni iliuuseqartoqarsinnaanermut annertusaaneq) makku allanngortinneqarput:</p> <p>1. § 2, imm. 3 atorunnaassaaq.</p>
	<p>§ 2 Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Nappaatit tunillaassortut akiorniarlugit iliuutsit pillugit Namminersorlutik Oqartussat nalunaarutaatigut nr. 16, 13. september 2006-imeersutigut, Inatsisartut inatsisaatigut nr. 18, 27. november 2018-imeersutigut aamma Namminersorlutik Oqartussat nalunaarutaatigut nr. 3, 2. marts 2020-meersutigut kiisalu Inatsisartut inatsisaatigut nr. 1-ikkut 1. april 2020-meersutigut makku allanngortinneqarput:</p> <p>1. § 31 kingorna una ikkunneqassaaq: ” § 32. Inatsisartut peqqussutaat 1. juuli 2022-mi atorunnaassaaq.”</p>
	<p>§ 3 Inatsisartut inatsisaat una ulloq 15. decembari 2021-mi atuutilissaaq.</p>

Ilanngussaq 2

Siunnersuut tusarniaavigisartakkanut 1. juuni 2021-miit 29. juuni 2021-mut tusarniaassutigineqarpoq:

Namminersorlutik Oqartussani Naalakkersuisoqarfinnut tamanut, Peqqissutsimut Pitsaaliuinernullu Aqutsisoqarfik, Kommuneqarfik Sermersooq, Kommune Kujalleq, Qeqqata Kommunia, Kommune Qeqertalik, Avannaata Kommunia, Nunatta Nakorsaaneqarfia, Nunatta Eqqartuussisuuneqarfia, Kalaallit Nunaanni Eqqartuussivik, Naalagaaffiup Sinniisoqarfia, Kalaallit Nunaanni Politimesteri.

Tamakku saniatigut siunnersuut Naalakkersuisut tusarniaassutigisaminnut nittartagaanni piffissami tassani pissarsiarineqarsinnaasimavoq.

Tusarniaanermut akissutit 7-it tiguneqarput. Siunnersuummut oqaaseqaateqartoqanngilaq.